

PRIMISLAUS DVX BOHEMIAE.



Primislaus egregiæ indolis adolescens apud Bohemos ex humili familia natus, suis uirtutibus & integritate uitæ cæteros æquales suos longè superabat. itaq; omnes magnâ de eo spem conceperant. Eo tempore Libussa Croci filia rempublicam Bohemorum magna solertia administrabat. Verùm Bohemî muliebri regimen auersati, petierunt ab ea, ut uicinarû more uiro nuberet, atque cum nuptiis principem declararet. Id cum Libussa percepisset: Ite, inquit, equum meum albicantem sternite, atq; in campo patente liberum effrenemq; dimittite. Curret enim equus, donec ante uirum subsistat, qui in ferrea mensa commedat.